

ZECHARHIA

Outeur : **Zechariah**
Aan : **Israeliete**
Rede : **Oor hulle**
Geskryf tussen : **geskiedenis.**
520-518

Voorwoord.

Zechariah was 'n tydgenoot van Aggai. Hoofstukke 1 - 8 bevat hoofsaaklik 'n aantal visioene oor die herstel van Jerusalem, die herbou van die temple, die loutering van die volk en die koms van die tydperk van Moseea. Hoofstukke 9 14 is 'n versameling boodskappe oor die verwagte Moseea en laaste oordeel.

Die Profeet Spoor die Volk aan om terug te keer na Adonai.

- 1 In die agtste maand, in die tweede jaar van Dariús, het die woord van Adonai gekom tot Zachariah, die seun van Berégja, die seun van Iddo, die profeet, en gesê:
- 2 Adonai was baie vertoornd op julle vaders.
- 3 So moet jy dan aan hulle sê: So spreek Adonai van die leërskaars: Keer terug na My, spreek Adonai van die leërskaars, en Ek sal na julle terugkeer, sê Adonai van die leërskaars.
- 4 Moenie soos julle vaders wees nie, tot wie die vroeëre profete geroep en gesê het:

So sê Adonai van die leërskaars: Bekeer julle tog van julle bose weë en julle bose werke; maar hulle het nie gehoor en na My nie geluister nie, spreek Adonai.

- 5 Julle vaders—waar is hulle? En sal die profete vir ewig lewe?
- 6 Maar my woorde en my insettinge wat Ek my knegte, die profete, beveel het, het dit julle vaders nie ingehaal nie, sodat hulle tot inkeer gekom en gesê het: Soos Adonai van die leërskaars Hom voorgeneem het om aan ons te doen ooreenkomstig ons weë en ons werke, so het Hy met ons gedoen?

Die Eerste Gesig: die Perde.

- 7 Op die vier en twintigste dag van die elfde maand, dit is die maand Sebat, in die tweede jaar van Dariús, het die woord van Adonai tot die profeet Sagaria, die seun van Berégja, die seun van Iddo, gekom en gesê:
- 8 Ek het in die nag 'n gesig gesien—daar was 'n man wat op 'n bruin perd ry, en hy het gestaan tussen die mirteboom wat in die diepte was; en agter hom was daar bruin, vos en wit perde.
- 9 Toe sê ek: Wat beteken dit, my heer? En die engel wat met my gespreek het, antwoord my: Ek sal jou toon wat dit beteken.
- 10 En die man wat tussen die mirteboom gestaan het, het aangehef en gesê: Dit is hulle wat Adonai gestuur het om die aarde te deurkruis.
- 11 Daarop het hulle die Engel van Adonai, wat tussen die mirteboom gestaan het, toegesprek en gesê: Ons het die aarde deurkruis, en kyk, die ganse aarde is stil en rustig.
- 12 Daarop het die Engel van Adonai aangehef en gesê: Adonai van die leërskaars, hoe lank nog bly U sonder ontferming oor Jerusalem en oor die stede van Juda waarop U alreeds sewentig jaar vertoornd was?
- 13 Toe antwoord Adonai die engel wat met my gespreek het, goeie woorde, troosvolle woorde.
- 14 Daarop sê die engel wat met my gespreek het: Roep en sê: So spreek Adonai van die leërskaars:

Ek ywer oor Jerusalem en oor Zion met 'n groot ywer;

- 15 maar Ek is grootliks vertoornd oor die sorglose nasies wat, terwyl Ek 'n weinig vertoornd was, die onheil aangehelp het.
- 16 Daarom, so sê Adonai: Ek wend My met ontferming tot Jerusalem; my huis sal daarin gebou word, spreek Adonai van die leërskaars, en 'n meetsnoer oor Jerusalem gespan word.
- 17 Roep verder en sê: So spreek Adonai van die leërskaars: My stede sal weer oorstroom wees van goeie dinge, en Adonai sal Zion weer vertroos, en Hy sal Jerusalem weer verkies.

Die Tweede Gesig: die Horings.

- 18 En ek het my oë opgeslaan en gekyk—daar was vier horings.

- 19 Toe sê ek aan die engel wat met my gespreek het: Wat beteken dit? En hy antwoord my: Dit is die horings wat Juda, Israhel en Jerusalem verstrooi het.
- 20 Daarop toon Adonai my vier smede.
- 21 Toe sê ek: Wat kom hulle maak? En Hy antwoord en sê: Dit is die horings wat Juda só verstrooi het dat niemand sy hoof opgehef het nie; maar hierdie manne het gekom om hulle skrik aan te jaag, om die horings van die nasies neer te werp wat die horing teen die land van Juda opgesteek het om dit te verstrooi.

Die Derde Gesig: Die Man met die Meetsnoer.

- 2 En ek het my oë opgehef en gekyk—daar was ‘n man met ‘n meetsnoer in sy hand.
- 2 Toe sê ek: Waar gaan u heen? En hy antwoord my: Om Jerusalem te meet, om te sien wat sy breedte en wat sy lengte is.
- 3 En meteens kom die engel wat met my gespreek het, vorentoe; en ‘n ander engel het te voorskyn gekom, hom tegemoet,
- 4 aan wie hy sê: Loop gou, spreek met hierdie jongman en sê: Jerusalem sal lê soos ‘n oop land weens die menigte van mense en vee daar binne-in.
- 5 En Ek sal vir hom wees, spreek Adonai, ‘n vurige muur rondom en tot heerlijkheid daar binne-in.
- 6 Op, op, vlug uit die Noordland, spreek Adonai! Want Ek het julle na die vier windstreke van die hemel verstrooi, spreek Adonai.
- 7 Op, o Zion, red jouself, jy wat woon by die dogter van Babel!
- 8 Want so sê Adonai van die leërske: Hy het my gestuur agter heerlijkheid aan na die nasies wat julle uitgebuit het; want wie julle aanraak, raak sy oogappel aan.
- 9 Want kyk, Ek sal my hand oor hulle swaai, sodat hulle ‘n buit word vir hulle knegte. Dan sal julle weet dat Adonai van die leërske my gestuur het.
- 10 Jubel, en wees bly, o dogter van Zion! Want kyk, Ek kom om in jou midde te woon, spreek Adonai.
- 11 En baie nasies sal hulle in dié dag by Adonai aansluit, en hulle sal My tot ‘n volk wees; en Ek

- sal in jou midde woon. Dan sal jy weet dat Adonai van die leërske my na jou gestuur het.
- 12 En Adonai sal besit neem van Juda as sy erfdeel op die heilige grond en Jerusalem weer verkies.
- 13 Swyg alle vlees voor Adonai! Want Hy verhef Hom uit sy heilige woning.

Die Vierde Gesig: Ieshou word Regverdig.

- 3 Daarna het Hy my Ieshou, die hoëpriester, laat sien, terwyl hy voor die Engel van Adonai staan, en die Satan aan sy regterhand staan om hom aan te klai.
- 2 Toe sê Adonai aan die Satan: Mag Adonai jou bestraf, o Satan! Ja, mag Adonai, wat Jerusalem verkies het, jou bestraf! Is hierdie een nie ‘n brandhout wat uit die vuur geruk is nie?
- 3 En Ieshou was bekleed met vuil klere, terwyl hy voor die Engel staan.
- 4 Daarop het Hy aangehef en gesê aan die wat voor Hom staan: Neem die vuil klere van hom weg. Toe sê Hy vir hom: Kyk, Ek het jou skuld van jou weggeneem, en Ek beklee jou met feesklere.
- 5 Daarop sê ek: Laat hulle ‘n rein tulband op sy hoof sit. En hulle het die rein tulband op sy hoof gesit en hom die klere aangetrek, terwyl die Engel van Adonai daarby staan.
- 6 En die Engel van Adonai het Ieshou plegtig verseker en gesê:
- 7 So sê Adonai van die leërske:
- As jy in my weë wandel en as jy my verordening onderhou, dan sal jy my huis bestuur sowel as my voorhowe bewaak, en Ek sal jou vrye toegang verleen onder diegene wat hier staan.
- 8 Luister tog, o Ieshou, jy wat die hoëpriester is, jy en jou vriende wat voor jou sit—ja, wondertekens is hulle. Want kyk, Ek sal my Kneg, die Spruit, laat kom!
- 9 Want kyk, die steen wat Ek voor Ieshou neergelê het—op die een steen is daar sewe oë; kyk, Ek sal sy graveersel graveer, spreek Adonai van die leërske, en Ek sal die skuld van hierdie land op een dag uitdelg.
- 10 In dié dag, spreek Adonai van die leërske, sal julle mekaar uitnooi onder die wingerdstok en onder die vyeboom.

Die Vyfde Gesig: Die Kandelaar.

- 4** En die engel wat met my gespreek het, het teruggekom en my gewek soos 'n man wat uit die slaap opgewek word.
- 2** En hy het vir my gesê: Wat sien jy? Toe antwoord ek: Ek sien daar 'n kandelaar, heeltemal van goud, en sy oliekan bo-oor hom en sy sewe lampe op hom; telkens sewe aanvoerpype loop na die lampe wat bo-oor hom is.
- 3** Ook twee olyfbome langs hom, een aan die regterkant van die oliekan en een aan die linkerkant daarvan.
- 4** Daarop het ek begin spreek en aan die engel wat met my gespreek het, gesê: Wat beteken dit, my heer?
- 5** En die engel wat met my gespreek het, antwoord en sê vir my: Weet jy dan nie wat dit beteken nie? En ek het gesê: Nee, my heer.
- 6** Toe antwoord hy en sê vir my:

Dit is die woord van Adonai aan Zerhubbábel, naamlik: Nie deur krag of deur geweld nie, maar deur my Gees, sê Adonai van die leërskaar.

- 7** Wie is jy, groot berg? Voor Zerhubbábel sal jy tot 'n gelykte word! En hy sal die sluitsteen te voorskyn bring onder uitroep van: Genade, genade oor hom!
- 8** En die woord van Adonai het tot my gekom en gesê:
- 9** Die hande van Zerhubbábel het die fondament van hierdie huis gelê, en sy hande sal dit voltooi; dan sal jy weet dat Adonai van die leërskaar my na julle gestuur het.
- 10** Want wie verag die dag van klein dinge, terwyl daardie sewe—die oë van Adonai wat die ganse aarde deurloop—met blydschap die skietlood aanskou in die hand van Zerhubbábel?
- 11** Daarop het ek begin spreek en aan hom gesê: Wat beteken hierdie twee olyfbome aan die

regterkant van die kandelaar en aan die linkerkant daarvan?

- 12** En ek het toe nogmaals gespreek en vir hom gesê: Wat beteken die twee olyftakkies aan die kant van die twee goue pype wat goud uit hulle laat uitstroom?
- 13** Toe antwoord hy my en sê: Weet jy nie wat dit beteken nie? En ek het gesê: Nee, my heer.
- 14** En hy sê: Dit is die twee gesalfdes wat by die Meester van die ganse aarde staan.

Die Sesde Gesig: Vlieënde Boekrol.

- 5** En ek het my oë weer opgeslaan en gekyk—daar was 'n vlieënde boekrol.
- 2** En hy het vir my gesê: Wat sien jy? Toe antwoord ek: Ek sien 'n vlieënde boekrol, sy lengte is twintig el en sy breedte tien el.
- 3** Daarop sê hy vir my: Dit is die vloek wat uitgaan oor die ganse land; want ooreenkomstig daarmee sal al die diewe hiervandaan weggeruim word, en ooreenkomstig daarmee sal al die meenediges hiervandaan weggeruim word.
- 4** En laat dit uitgaan, spreek Adonai van die leërskaar, en dit sal kom in die huis van die dief en in die huis van hom wat vals sweer by my Naam; en dit sal binne-in sy huis vernag en dit verteer saam met sy balke en sy klippe.

Die Sewende Gesig: Die Vrou in die Efa.

- 5** Daarop kom die engel vorentoe wat met my gespreek het, en sê vir my: Slaan tog jou oë op, en kyk wat daar te voorskyn kom.
- 6** Toe sê ek: Wat beteken dit? En hy antwoord: Dit is die efa wat te voorskyn kom. Verder het hy gesê: So lyk hulle in die ganse land.
- 7** En meteens word daar 'n looddeksel opgelig, en daar was 'n vrou wat binne-in die efa sit.
- 8** En hy sê: Dit is die boosheid. En hy het haar binne-in die efa teruggewerp en die looddeksel op die opening daarvan gegooi.
- 9** Toe slaan ek my oë op en kyk—daar kom twee vroue te voorskyn met die wind in hulle vlerke; en hulle het vlerke gehad soos die vlerke van 'n groot sprinkaanvoël, en hulle het die efa weggevoer tussen die aarde en die hemel.

- 10 Daarop sê ek aan die engel wat met my gespreek het: Waarheen bring hulle die efa?
- 11 En hy antwoord my: Om vir haar 'n huis te bou in die land Sínear; en is dit klaar, dan word sy daar op haar plek neergesit.

Die Agste Gesig: Die Vier Strydwaens.

- 6** En ek het weer my oë opgeslaan en gekyk—daar was vier strydwaens wat tussen die twee berge uit te voorskyn kom, en die berge was berge van koper.
- 2 Voor die eerste wa was bruin perde, en voor die tweede wa swart perde,
- 3 en voor die derde wa wit perde, en voor die vierde wa bont perde, sterkes.
- 4 Daarop het ek aangehef en aan die engel wat met my gespreek het, gesê: Wat beteken dit, my heer?
- 5 En die engel het geantwoord en vir my gesê: Dit is die vier winde van die hemel wat uitgaan nadat hulle hul gestel het by die Meester van die ganse aarde.
- 6 Dié met die swart perde trek uit na die land van die noorde, en die wittes trek uit agter hulle aan; en die bontes trek uit na die land van die suide.
- 7 En toe die sterkes uittrek, het hulle begeer om weg te trek om die aarde te deurkruis; en Hy het gesê: Trek weg, deurkruis die aarde! En hulle het die aarde deurkruis.
- 8 Toe het Hy my geroep en aan my dit gesê: Kyk, die wat uittrek na die land van die noorde, hulle bring my Gees tot rus in die land van die noorde.
- 9 En die woord van Adonai het tot my gekom en gesê:
- 10 Neem aan van die ballinge, uit die hand van Heldai, Tobía en Jedáia—kom jy op dieselfde dag en gaan na die huis van Iosia, die seun van Zephania, waar hulle uit Babel aangekom het—
- 11 neem dan aan silwer en goud, en maak 'n kroon en sit dit op die hoof van Ieshou, die seun van Iósadak, die hoëpriester,
- 12 en sê vir hom dit: So spreek Adonai van die leërske:

Kyk, daar kom 'n Man wie se Naam is Spruit, en Hy sal uit sy plek uitspruit, en Hy sal die tempel van Adonai bou.

- 13 Ja, Hy sal die tempel van Adonai bou, en Hy sal majesteit verkry en sit en heers op sy troon; ook sal Hy 'n priester wees op sy troon, en die raad van vrede sal tussen hulle twee bestaan.

- 14 En die kroon moet as gedagtenis bly aan Helem en Tobía en Jedája, en aan die vriendelikheid van die seun van Zephania in die tempel van Adonai.
- 15 En die wat ver is, sal kom en aan die tempel van Adonai bou. Dan sal julle weet dat Adonai van die leërske my na julle gestuur het. En dit sal so wees, as julle nougeset luister na die stem van Adonai julle Aleim.

Ongehoorsaamheid was die Oorsaak van Ballingskap.

- 7** En in die vierde jaar van koning Darius het die woord van Adonai tot Sagaría gekom, op die vierde dag van die negende maand, in die maand Kislew.
- 2 Bet-el het toe Saréser en Regem-Meleg met sy manne gestuur om die aangesig van Adonai om genade te smee
- 3 deur aan die priesters wat by die huis van Adonai van die leërske was, en aan die profete die vraag te stel: Moet ek in die vyfde maand ween met vas soos ek nou al so baie jare gedoen het?
- 4 Daarop het die woord van Adonai van die leërske tot my gekom en gesê:
- 5 Spreek tot die hele volk van die land en tot die priesters dit: As julle, nou sewentig jaar lank, in die vyfde en in die sewende maand gevas en getreur het, het julle toe werklik ter wille van My gevas?
- 6 En as julle eet en as julle drink, is dit dan nie julle wat eet en julle wat drink nie?
- 7 Is dit nie so met die woorde wat Adonai deur die diens van die vroeëre profete verkondig het nie, toe Jerusalem en sy omliggende stede nog bewoond en rustig was, en ook die Suidland en die Laeveld nog bewoond was?
- 8 Verder het die woord van Adonai tot Sagaría gekom en gesê:
- 9 So het Adonai van die leërske gespreek en gesê:

Spreek 'n eerlike vonnis uit en bewys liefde en barmhartigheid die een aan die ander.

- 10 En moet nie die weduwee en die wees, die vreemdeling en die arme verdruk nie en kwaad in julle hart teenoor mekaar bedink nie.
- 11 Maar hulle het geweier om te luister en wederstewig die skouer afgewend en hulle ore toegestop om nie te hoor nie.
- 12 Ook het hulle hul hart soos 'n diamant gemaak, om nie die wet te verneem nie en die woorde wat Adonai van die leërskaer deur sy Gees, deur die diens van die vroeëre profete gestuur het nie. So het daar dan van Adonai van die leërskaer 'n groot toorn gekom.
- 13 Daarom, soos Hy geroep en hulle nie gehoor het nie—so sal hulle roep, maar Ek nie hoor nie, het Adonai van die leërskaer gesê.
- 14 Maar Ek sal hulle wegstorm onder al die nasies wat hulle nie geken het nie, terwyl die land agter hulle verwoes is, sodat niemand meer heen en weer trek nie. So het hulle dan die kostelike land tot 'n wildernis gemaak.

Jerusalem, Heilige Stad van die Toekoms.

- 8 En die woord van Adonai van die leërskaer het gekom en gesê:
- 2 So spreek Adonai van die leërskaer:
- Ek ywer oor Zion met 'n groot ywer, ja, Ek ywer met groot grimmigheid daarvoor.
- 3 So sê Adonai:
- Ek keer terug na Zion en sal midde-in Jerusalem woon; en Jerusalem sal genoem word: Die stad van trou, en die berg van Adonai van die leërskaer: Die heilige berg.
- 4 So sê Adonai van die leërskaer:
- Daar sal weer ou manne en ou vroue op die pleine van Jerusalem sit—elkeen met sy stok in sy hand vanweë die veelheid van hulle dae.
- 5 En die pleine van die stad sal vol wees van seuntjies en dogtertjies wat op die pleine daarvan speel.

- 6 So sê Adonai van die leërskaer:

As dit te wonderbaar is in die oë van die oorblyfsel van hierdie volk in dié dae, sal dit ook in my oë te wonderbaar wees? spreek Adonai van die leërskaer.

- 7 So sê Adonai van die leërskaer:

Kyk, Ek gaan my volk verlos uit die land van die ooste en uit die land van die weste

- 8 en hulle aanbring; en hulle sal midde-in Jerusalem woon. Dan sal hulle vir My 'n volk wees, en Ék sal vir hulle 'n Aleim wees, in trou en geregtigheid.

- 9 So sê Adonai van die leërskaer:

Laat julle hande sterk wees, julle wat in hierdie dae sulke woorde gehoor het uit die mond van die profete op die dag toe die fondament gelê is van die huis van Adonai van die leërskaer, die tempel, om gebou te word.

- 10 Want vóór hierdie dae het die mense geen loon getrek nie, ook vir die diere was daar geen loon nie; en vir die wat uit— en ingaan, was daar weens die teëstander geen veiligheid nie; want Ek het al die mense die een teen die ander losgelaat.

- 11 Maar nou sal Ek vir die oorblyfsel van hierdie volk nie wees soos in vroeër dae nie, spreek Adonai van die leërskaer.

- 12 Want die saad van vrede, die wingerdstok, sal sy vrug gee, en die aarde sy opbrings lewer, en die hemel sal sy dou skenk; en die oorblyfsel van hierdie volk sal Ek al hierdie dinge laat beërwe.

- 13 En soos julle 'n vloek gewees het onder die nasies, o huis van Juda en huis van Israhel, so sal Ek julle verlos, dat julle 'n seën kan wees. Wees nie bevrees nie, laat julle hande sterk wees.

- 14 Want so sê Adonai van die leërskaer:

Soos Ek My voorgeneem het om julle kwaad aan te doen, toe julle vaders My vertoorn het, sê Adonai van die leërskaars, en Ek daar geen berou van gehad het nie—

- 15 so het Ek My weer voorgeneem om in hierdie dae goed te doen aan Jerusalem en die huis van Juda. Wees nie bevrees nie.
- 16 Dit is die dinge wat julle moet doen: Spreek die waarheid met mekaar; beoefen waarheid en 'n regspraak van vrede in julle poorte!
- 17 En julle moet nie mekaar se onheil in jul hart versin nie, en nie die valse eed liefhê nie. Want dit alles haat Ek, spreek Adonai.

Vasdae sal Vrolike feestye word.

- 18 En die woord van Adonai van die leërskaars het tot my gekom en gesê:
- 19 So sê Adonai van die leërskaars:

Die vasdag in die vierde en die vasdag in die vyfde en die vasdag in die sewende en die vasdag in die tiende maand moet vir die huis van Juda 'n vreugde en blydschap wees en vrolike feestye, maar julle moet die waarheid en die vrede liefhê.

Ander Volke sal ook na Jerusalem kom.

- 20 So sê Adonai van die leërskaars: Nog sal volke aankom en die inwoners van baie stede.
- 21 En die inwoners van die een stad sal gaan na die ander en sê: Kom, laat ons heengaan om die aangesig van Adonai om genade te smek en Adonai van die leërskaars te soek. Ek wil ook gaan!
- 22 So sal dan baie volke en magtige nasies kom om Adonai van die leërskaars in Jerusalem te soek en die aangesig van Adonai om genade te smek.
- 23 So sê Adonai van die leërskaars: In dié dae sal tien man uit al die tale van die nasies die slip van 'n Joodse man gryp en dit vashou en sê: Ons wil met julle saamgaan, want ons het gehoor dat Aleim met julle is.

Komende Koning van Zion.

- 9** Uitspraak. Die woord van Adonai teen die land Hadrag, en op Damaskus bly dit rus—want Adonai hou die oog op die mense en op al die stamme van Israhel.

- 2 En ook teen Hamat wat daaraan grens; teen Tirus saam met Sidon, want hy is baie slim.
- 3 Ja, Tirus het vir hom 'n vesting gebou; ook het hy silwer opgehoop soos stof en goud soos modder van die strate.

Adonai sal die Buurvolke Straf.

- 4 Kyk, die Meester sal hom in besit neem en sy skans in die see werp, en hy sal deur vuur verteer word.
- 5 Askelon sal dit sien en vrees; ook Gasa, wat sal sidder van angs; ook Ekron, omdat sy toeverlaat teleurgestel het; en uit Gasa verdwyn die koning, en Askelon bly onbewoond;
- 6 en die baster sal in Asdod woon—so sal Ek dan aan die trotsheid van die Filistyn 'n einde maak—
- 7 en Ek sal die bloed uit sy mond verwyder en sy verfoeisels tussen sy tande uit; so sal hy dan ook vir onse Aleim oorbly en wees soos 'n stamhoof in Juda, en Ekron soos 'n Jebusiet.
- 8 En Ek sal om my huis 'n laer trek teen die leërmag, teen die wat heen en weer trek, sodat geen oorheersers hulle weer sal oorrompel nie; want nou het Ek dit met my eie oë gesien.

Die Vrederyk van die Mosea.

- 9 Verheug jou grootliks, o dogter van Zion! Juig, o dogter van Jerusalem! Kyk, jou Koning kom na jou; regverdig en 'n oorwinnaar is Hy; nederig en Hy ry op 'n esel—op 'n jong esel, die vul van 'n eselin.
- 10 En Ek sal die strydwaens uit Ephraim en die perde uit Jerusalem uitroei, en die strydboog sal vernietig word. Dan sal Hy aan die nasies vrede verkondig, en sy heerskappy sal wees van see tot see, en van die Eufraat tot aan die eindes van die aarde.
- 11 Ook sal Ek, wat jou betref, o Zion, kragtens die bloed van jou verbond jou gevangenes loslaat uit die put sonder water.
- 12 Keer terug na die vesting, o hoopvolle gevangenes! Ook kondig Ek vandag aan dat Ek jou dubbel sal vergoed.

- 13 Want Ek span Juda vir My as boog, lê Ephraim as pyl daarop; en Ek vuur jou seuns, o Zion, aan teen jou seuns, o Jawan, en Ek maak jou soos die swaard van 'n held.
- 14 Dan sal Adonai oor hulle verskyn, en soos weerlig sal sy pyl uitskiet; en Adonai Aleim sal met die basuin blaas en intrek met die storms uit die suide.
- 15 Die Adonai van die leërskaars sal hulle beskut; en hulle sal verslind, ja, slingerstene vertrap; ook sal hulle drink, 'n gedruis maak soos deur wyn en vol wees soos die offerkomme, soos die hoeke van 'n altaar.

Adonai sal Sy Volk Verlos.

- 16 En Adonai hulle Aleim sal hulle in dié dag verlos as die kudde wat sy volk is; want hulle is kroongesteentes wat hulle skitterend verhef oor sy land.
- 17 Want hoe groot is hulle voortreflikheid, en hoe groot hulle skoonheid! Die koring laat jongmanne en die mos jongedogters groei.

Juda en Israhel Herstel.

- 10** Bid tot Adonai om reën in die tyd van die laat reëns; Adonai maak die weerligte, en Hy sal aan hulle 'n stortreën gee, plante op die veld aan iedereen.
- 2 Want die huisgode spreek bedrog, en die waarsêers sien leuens en verkondig nietige drome, hulle troos met wind. Daarom het hulle weggeswerwe soos 'n kudde; hulle verkeer in verdrukking, omdat daar geen herder is nie.
- 3 Teen die herders het my toorn ontvlam, en oor die voorbokke sal Ek besoeking bring; want Adonai van die leërskaars gee ag op sy kudde, op die huis van Juda, en maak hulle tot sy pragtige perd in die stryd.
- 4 Uit hom sal die hoeksteen, uit hom die muurpen, uit hom die strydboog, uit hom die heersers almal saam uitgaan.
- 5 En hulle sal wees soos helde wat in die oorlog die modder van die strate vertrap; en hulle sal veg, want Adonai is met hulle; en die ruitery sal beskaamd uitkom.

- 6 En Ek sal die huis van Juda sterk maak en aan die huis van Ioseph hulp verleen en hulle 'n woonplek aanwys, want Ek ontferm My oor hulle; en hulle sal wees asof Ek hulle nie verwerp het nie, want Ek is Adonai hulle Aleim, en Ek sal hulle verhoor.
- 7 En Ephraim sal wees soos 'n held, en hulle hart sal vrolik wees soos deur wyn, en hulle kinders sal dit sien en hulle verbly, hulle hart sal juig in Adonai.
- 8 Ek wil vir hulle fluit en hulle vergader, want Ek het hulle losgekoop; en hulle sal net so talryk wees soos tevore.
- 9 En Ek sal hulle saai onder die volke, en in die verafgeleë streke sal hulle aan My dink; en hulle sal saam met hul kinders in die lewe bly en terugkom.
- 10 En Ek sal hulle terugbring uit Egipteland en uit Assur hulle vergader en hulle na die land Gílead en die Líbanon bring; maar dit sal vir hulle nie voldoende wees nie.
- 11 En Hy sal deur die see van benoudheid trek en die golwe in die see slaan, en al die dieptes van die Nyl sal opdroog; ook sal die trotsheid van Assírië neergewerp word, en die septer van Egipteland wyk.
- 12 En Ek sal hulle sterk maak in Adonai, en hulle sal in sy Naam wandel, spreek Adonai.

Profesie Oor die Herders.

- 11** Open jou deure, o Líbanon, sodat vuur jou sederbome verteer!
- 2 Huil, o sipres, omdat die seder geval het, omdat die pragtige bome verwoes is! Huil, eike van Basan, omdat die ontoeganklike woud afgekap is.
- 3 Hoor! die gejammer van die herders, want hulle heerlikheid is verwoes. Hoor! die geknor van die jong leeus, want die pronkbosse van die Jordaan is verwoes.

Die Goeie en Slegte Herders.

- 4 So sê Adonai my Aleim: Wees herder van die slagskape—
- 5 hulle kopers maak hulle dood, sonder om skuldig te voel; hulle verkopers sê: Geloofd sy

- Adonai; ek word ryk! En hulle herders het geen medelyde met hulle nie.
- 6 Want Ek sal met die inwoners van die land geen medelyde meer hê nie, spreek Adonai; maar kyk, Ek gaan die mense oorlewer, elkeen in die hand van sy naaste en in die hand van sy koning; en hulle sal die land verwoes, en Ek sal uit hulle hand nie red nie.
- 7 En ek het die slagskape—waarlik ellendige skape! —opgepas; en ek het vir my twee stawe geneem. Die een het ek genoem: Lieflikheid, en die ander het ek genoem: Samebinding; en ek het die skape opgepas.
- 8 En ek het die drie herders in een maand vernietig. Toe het my siel ongeduldig geword oor hulle, terwyl hulle siel ook van my afkerig geword het.
- 9 Daarop het ek gesê: Ek wil julle nie meer oppas nie—wat sterwend is, laat sterwe; en wat verlore gaan, laat verlore wees, en laat die wat oorbly, mekaar se vleis verslind!
- 10 Toe het ek my staf Lieflikheid geneem en dit verbreek, om my verbond wat ek met al die volke gesluit het, te verbreek.
- 11 En dit is op dié dag verbreek. En so het die ellendiges onder die skape wat op my ag gegee het, bemerk dat dit 'n woord van Adonai was.
- 12 Daarop sê ek vir hulle: As dit goed is in julle oë, gee dan my loon; en so nie, laat dit dan staan. Toe het hulle my loon afgeweeg: dertig sikkels silwer.
- 13 Hierop sê Adonai vir my: Gooi dit vir die pottbakker—die heerlike prys waarmee Ek deur hulle gewaardeer is! En ek het die dertig sikkels silwer geneem en dit in die huis van Adonai vir die pottbakker gegooi.
- 14 Toe het ek my tweede staf, Samebinding, verbreek, om die broederskap tussen Juda en Israhel te verbreek.
- 15 Daarop sê Adonai vir my: Neem weer vir jou die gereedskap van 'n herder, van 'n dwase.
- 16 Want kyk, Ek sal 'n herder verwek in die land; na wat verlore is, sal hy nie omkyk nie; wat verstrooi is, nie opsoek nie; en wat gebroke is, nie genees nie; en wat nog regop staan, nie versorg nie. Maar die vleis van die vettes sal hy eet en selfs hulle kloue afruk.

- 17 Wee die slegte herder wat die skape in die steek laat! Mag die swaard sy arm tref en sy regteroog! Mag sy arm heeltemal verdor en sy regteroog heeltemal verduister word!

Rouklaag oor die Seun wat Deurboor is.

- 12** Uitspraak. Die woord van Adonai oor Israhel. Die Adonai spreek, wat die hemele uitsprei en die aarde grondves en die gees van die mens in sy binneste formeer:
- 2 Kyk, Ek maak Jerusalem vir al die volke rondom tot 'n beker van bedwelming, en ook teen Juda sal dit wees tydens die beleëring teen Jerusalem.
- 3 En in dié dag maak Ek Jerusalem tot 'n baie swaar klip vir al die volke: elkeen wat dit optel, sal hom daarmee sekerlik seer maak; en al die nasies van die aarde sal daarteen vergader word.
- 4 In dié dag, spreek Adonai, sal Ek al die perde met verwarring slaan en hulle ruiters met waansin; maar oor die huis van Juda sal Ek my oë oophou, terwyl Ek al die perde van die volke met blindheid slaan.
- 5 Dan sal die stamhoofde van Juda in hulle hart sê: Die inwoners van Jerusalem is vir my 'n sterkte deur Adonai van die leërs, hulle Aleim.
- 6 In dié dag sal Ek die stamhoofde van Juda maak soos 'n pan met vuur onder 'n hoop hout en soos 'n brandende fakkel onder gerwe—hulle sal regs en links al die volke rondom verteer; maar Jerusalem sal nog bewoond wees op sy plek in Jerusalem.
- 7 En Adonai sal eers die tente van Juda verlos, sodat die roem van die huis van Dabid en die roem van die inwoners van Jerusalem dié van Juda nie sal oortref nie.
- 8 In dié dag sal Adonai die inwoners van Jerusalem rondom beskut, en die struikelende onder hulle sal in dié dag wees soos Dabid, en die huis van Dabid soos 'n hemelse wese, soos die Engel van Adonai voor hulle uit.
- 9 Ook sal Ek in dié dag daarna soek om al die nasies wat teen Jerusalem aankom, te verdelg.

Berou in Jerusalem.

- 10 Maar oor die huis van Dabid en oor die inwoners van Jerusalem sal Ek uitgiet die Gees

van genade en smeking; en hulle sal opsien na My vir wie hulle deurboor het, en hulle sal oor Hom rouklaag soos 'n mens rouklaag oor 'n enigste seun en bitterlik oor Hom ween soos 'n mens bitterlik ween oor 'n eersgebore kind.

- 11 In dié dag sal die rouklag groot wees in Jerusalem, soos die rouklag van Hadad-Rimmon in die laagte van Megiddo.
- 12 En die land sal rouklaag by geslagte, elke geslag afsonderlik; die geslag van die huis van Dabid afsonderlik, en hulle vroue afsonderlik; die geslag van die huis van Natan afsonderlik, en hulle vroue afsonderlik;
- 13 die geslag van die huis van Levi afsonderlik, en hulle vroue afsonderlik; die geslag van Simeï afsonderlik, en hulle vroue afsonderlik.
- 14 Al die ander geslagte—elke geslag afsonderlik, en hulle vroue afsonderlik.

Die Herder se Redder.

- 13** In dié dag sal daar 'n geopende fontein wees vir die huis van Dabid en vir die inwoners van Jerusalem teen sonde en onreinheid.
- 2 En in dié dag, spreek Adonai van die leërskaare, sal Ek die name van die afgode uit die land uitroei, sodat aan hulle nie meer gedink sal word nie; en ook die profete en die onreine gees sal Ek uit die land laat wegtrek.
- 3 En as iemand nog wil profeteer, sal sy vader en sy moeder wat hom verwek het, vir hom sê: Jy mag nie langer lewe nie, want jy het leuens in die Naam van Adonai verkondig; en sy vader en sy moeder wat hom verwek het, sal hom deurboor as hy wil profeteer.
- 4 En in dié dag sal elkeen van die profete, as hy profeteer, hom skaam oor sy gesig; en hulle sal die harige mantel nie aantrek om te lieg nie.
- 5 Maar hy sal sê: Ek is geen profeet nie, ek is 'n man wat die grond bewerk; want iemand het my van my jeug af as slaaf gekoop.
- 6 En as iemand vir hom sê: Watter wonde is daardie tussen jou hande? dan sal hy antwoord: So is ek geslaan in die huis van my vriende.
- 7 Ontwaak, o swaard, teen my herder, en teen die man wat my metgesel is! spreek Adonai van die leërskaare. Slaan die herder, sodat die

skape verstrooi word; en Ek sal my hand weer uitstrek oor die geringes.

- 8 En in die ganse land, spreek Adonai—twee-derdes sal daarin uitgeroei word, sal sterwe, maar een-derde daarin oorbly.
- 9 Dan sal Ek die derde deel in die vuur bring en hulle smelt soos 'n mens silwer smelt en hulle toets soos 'n mens goud toets. Hulle sal my Naam aanroep, en Ek sal hulle verhoor. Ek sê: Dit is my volk! En hulle sal sê: Die Adonai, my Aleim!

Kyk, daar kom 'n dag vir Adonai

- 14** 1 Kyk, daar kom 'n dag vir Adonai; dan sal wat van jou buitgemaak is, binne-in jou verdeel word, o Jerusalem!
- 2 Want Ek sal al die nasies versamel om oorlog te voer teen Jerusalem; en die stad sal ingeneem en die huise geplunder en die vroue onteer word, en die helfte van die stad sal uitgaan in ballingskap; maar die orige deel van die bevolking sal nie uit die stad uitgeroei word nie.
- 3 En Adonai sal uittrek en stryd voer teen dié nasies soos op die dag van sy stryd, die dag van oorlog.
- 4 En in dié dag sal sy voete staan op die Olyfberg wat voor Jerusalem lê, aan die oostekant; en die Olyfberg sal middeldeur gesplyt word van oos na wes tot 'n baie groot dal; en die een helfte van die berg sal wegwyk na die noorde en die ander helfte na die suide.
- 5 En julle sal vlug in die dal van my berge—want die dal van die berge sal loop tot by Asal—en julle sal vlug soos julle gevlug het vir die aardbewing in die dae van Ussia, die koning van Juda. Dan sal Adonai my Aleim kom, al die heiliges met U!
- 6 En in dié dag sal daar geen lig wees nie, die sterre sal duister wees.
- 7 En dit sal 'n enige dag wees wat aan Adonai bekend is—geen dag en geen nag nie; maar teen die aand sal dit lig word.
- 8 En in dié dag sal daar lewende waters uit Jerusalem uitvloei, die een helfte daarvan na die

- Oostelike en die ander helfte daarvan na die Westelike See; somer en winter sal dit so wees.
- 9 En Adonai sal Koning wees oor die hele aarde; in dié dag sal Adonai een wees, en sy Naam een.
- 10 Die hele land sal soos die Vlake word, van Geba tot by Rimmon, suid van Jerusalem; maar Jerusalem self sal hoog wees en woon op sy plek, van die poort van Benjamin af tot by die plek van die vorige poort, tot by die Hoekpoort, en van die toring Hanáneël tot by die parskuipe van die koning.
- 11 En hulle sal daarin woon, en daar sal geen banvloek meer wees nie, en Jerusalem sal in veiligheid woon.
- 12 En dit sal die plaag wees waarmee Adonai al die volke sal tref wat opgetrek het om teen Jerusalem te veg:
- Hy sal hulle vlees laat wegteer, terwyl hulle nog op hul voete staan; en hulle oë sal wegteer in hulle holtes, en hulle tong wegteer in hulle mond.
- 13 En in dié dag sal 'n groot verwarring van Adonai onder hulle kom, sodat die een die hand van die ander sal gryp, en die hand van die een hom sal verhef teen die hand van die ander.
- 14 En Juda sal ook in Jerusalem veg, en die rykdom van al die nasies rondom sal ingesamel word: goud en silwer en klere—'n groot hoeveelheid.
- 15 En soos hierdie plaag is, sal die plaag wees van die perde, die muile, die kamele en die esels en van al die diere wat in daardie laers is.
- 16 En almal wat oorbly uit al die nasies wat teen Jerusalem aangekom het, sal jaar na jaar optrek om te aanbid voor die Koning, Adonai van die leërskaars, en om die huttefees te vier.
- 17 En wie uit die geslagte van die aarde nie na Jerusalem optrek om voor die Koning, Adonai van die leërskaars, te aanbid nie—hulle sal geen reën kry nie.
- 18 En as die geslag van Egipte nie optrek en nie kom nie, op wie geen reën sal val nie, dan sal

- tog die plaag hulle tref waarmee Adonai die nasies tref wat nie opgaan om die huttefees te vier nie.
- 19 Dit sal die straf van Egipte wees en die straf van al die nasies wat nie optrek om die huttefees te vier nie.
- 20 In dié dag sal op die klokke van die perde staan: Heilig aan Adonai! En die potte in die huis van Adonai sal wees soos die komme voor die altaar.
- 21 Ja, al die potte in Jerusalem en Juda sal aan Adonai van die leërskaars heilig wees; en almal wat wil offer, sal kom en daarvan neem en daarin kook; en in dié dag sal daar geen Kanaäniet in die huis van Adonai van die leërskaars meer wees nie.